

Segun prensa local,

Maneho di minister Herdé creando division den partido AVP

Despues di hopi atraso, comienzo di luna Gabinete AVP-Futuro a huramenta su di siete y ultimo minister, Sr. Rene 'Baba' Herdé, como minister di Infraestructura, Energia y Medio Ambiente. Esaki despues di un turbulencia cu e candidato inicial, actual parlamentario Mike de Meza, kende na final a keda reemplasa pa Herdé. Den weekend, medionan di comunicacion local a informa cu e maneho nobo di Herdé ta creando division den e partido berde.

Informacion di dos diferente medio local a indica cu tin problema entre De Meza y Herdé, pasobra aparentemente tabatin un acuerdo entre nan dos tocante e maneho den e cartera, y awo no ta cumpliendo cu esaki. Pa e motibo aki, tin tension dentro di e partido.

Por recorda cu a nombra Herdé como minister despues cu De Meza no a pasa screening y no a logra resolve e problema den corte tampoco. Awo prensa local ta reporta cu tabatin palabracion cu ora Herdé asumi e cartera, lo duna De Meza oportuni-



dad pa tin influencia den e cartera y posiciona hende di confiansa di De Meza den e ministerio. Es mas, e idea lo tabata pa Herdé fungi como un minister 'temporal' mientras De Meza ta keda purba di resolve e obstaculonan cu ta impide di keda nombra como minister den Gabinete AVP-Futuro.

Comentarionan di premier Mike Eman mes a duna di compronde cu esaki tabata e caso, maske sin tanto detaye. Den declaracionnan na prensa local den sala di Consejo di Minister e luna aki, minister Herdé a bisa: "Kiermen cu e expertonan cu a traha e plan, cu expertonan di colega Mike de Meza, hopi

lihe nos ta bay sinta traha riba e plannan con ta bay ehecuta nan. Awo'ki no ta tempo mas pa bay planea. E plannan t'ey, awo ta ehecuta."

Den e comunicado di prensa di gobierno tocante e prome Consejo di Minister den cual Herdé a participa, ta menciona cu "hunto cu e experticio di esnan cu a traha e plan aki, manera ingeniero Mike de Meza y su ekipo, lo cuminsa cu ehecucion di e maneho nobo." Esaki ta duna di compronde cu e intencion tabata pa parlamentario Mike de Meza ta involucra den comparti su experticio den implementacion di e maneho di Energia.

Ya caba prome cu a nombra minister Herdé, prome minister Eman a duna indicacion cu parlamentario De Meza tabata involucra den e maneho di e cartera di Infraestructura y Energia, cu tabata provisionalmente den man di minister Arthur Dowers. Comienso di luna, anunciando cu lo busca un reemplazo pa De Meza, Eman a bisa prensa local cu el "a consulta continuamente [cu De Meza] si riba kico mester haci riba e tereno cu el a haci hopi trabao adicional, y minister Dowers ta den contacto cune riba e ideanan cu e tin pa locual ta trata e diferente portefeulle y awo cu e ta bisto cu nos tuma e siguiente paso pa yena e buraco den e portfolio aki, nos

ta bay ta canando e caminda ey."

Sinembargo, awo ta parece cu minister Herdé no ta cumpliendo cu e palabracionnan haci dentro di e partido. No ta siguiendo e maneho cu De Meza a stipula, y tampoco ta tumando hende di confiansa di De Meza den e ministerio. Esaki a causa iritacion cerca e parlamentario, segun prensa local. Y cu un biaha mas, De Meza lo ta menasando di bandona e partido y bay cu su asiento. Esaki si no logra drecha e situacion prome cu parlamento bolbe di reces.

Mientras tanto, partido di oposicion, MEP a expresa hopi critica riba e posible involucramento di De Meza den un ministerio di gobierno, ya cu esaki ta viola e principio di trias politica, cu ta separa e poder ehecutivo (gobierno) di esun legislativo (parlamento.) Tambe a critica cu De Meza den tres luna no a presenta den parlamento, loke ta crea mas tension rond di e situacion aki.

Entre tanto, no tin confirmacion oficial for di partido AVP riba e desaroyonan aki.

Wardacosta a intercepta barco cu 16 homber indocumenta

Den oranan di diasabra anochi, a tuma nota di un contacto sospechoso nabegando den direccion di Aruba. Inmediatamente a notifica personal di e avion di Wardacosta pa dirigi nan mes rapidamente na e localidad.

Mientras tanto, tambe a pidi personal di un Metal Shark pa sali for di Steunpunt y dirigi nan mes den e mes un direccion. E avion a logra di constata cu ta trata di un lancha cu personanan indocumenta.

E Metal Shark a logra di yega na e momento necesario pa asina por intercepta e lancha riba lama. A transporta e lancha y e personanan y a hiba nan te na Steunpunt na Savaneta.

Ta trata di un total di 16 hende homber indocumenta.

Di e 16 personanan, a detene 2 y a entrega e otro 14 homber nan na personal di



Warda Nos Costa, segun Wardacosta Region Caribe a informa den un comunicado di prensa.

Amnistia
E noticia aki a causa alarma, ya cu recientemente prome minister Mike Eman (AVP) a anuncia cu tin un plan pa duna amnistia na indocumentadonan na Aruba, y tin preocupacion cu e comentarionan aki lo crea un mo-

tivacion pa hende purba yega Aruba di manera ilegal.

Manera Bon Dia Aruba a publica anteriormente, premier Eman a duna comentarionan na un medio di comunicacion local unda a informa cu fin di luna pasa, a presenta den Consejo di Minister un plan pa duna amnistia na indocumentadonan na Aruba.

Contestando kico e rekisi-

tonan lo ta pa bin na remarca pa e amnistia, Eman a indica cu solamente esnan cu tabata na Aruba caba prome cu a entrega e plan den Consejo di Minister lo bin na remarca. "Pasobra nos tabata sa cu despues di present'e na Consejo di Minister, lo bin rumor, y logicamente e preferencia, y e aspecto cu nos kier regla, ta pa hende cu ya ta akinan," Eman a bisa. "Nos no ta bay crea un situacion unda hende cu ta scucha cu nos ta bay tin un programa lo bin." Eman a bisa cu ya e fecha limite ta fiha, unda hende cu tabata na Aruba caba na momento cu a presenta e proyecto den Consejo di Minister dos siman atras so lo bin na remarca pa loke el a yama e "formalisacion."

Sinembargo, ora ta trata di persona indocumentado, no tin un manera pa proba exactamente for di ki dia nan ta na Aruba. Obviamente pasobra no tin ningun documento indicando un entrada legal na nos isla.

Gobierno anterior tambe tabatin un propuesta pa un sorto di "flexibilisacion" cu lo permiti algun persona indocumentado legalisa nan situacion. Manera minister e tempo aya, Glenbert Croes (MEP) a informa, e idea tabata pa permiti solamente esnan cu a drenta Aruba di manera legal. Kiermen hende cu a bin di vakantie, pero a keda na Aruba. E hendenan aki lo haya un oportunidad pa haya un estadia legal, y den e caso aki, lo tin un prueba na ki momento y di ki forma nan a drenta Aruba.

Sinembargo, Gabinete AVP-Futuro no a duna ningun detaye di nan plan di amnistia te awo. Dos siman atras, Bon Dia Aruba a manda pregunta pa minister Arthur Dowers (AVP), kende ta encarga cu e proyecto, y el a indica cu lo duna mas informacion tocante esaki siman pasa. Sinembargo, te ciere di e edicion aki, no a haya mas contesta.